

Svaku ranu koja je u ustima 2 ili više sedmica trebao bi pregledati zubni doktor ili doktor, osobito ukoliko nije bolna. Bolne rane na unutrašnjoj strani usne ili obraza obično imaju manje ozbiljne uzroke, to mogu biti afte ili slučajni ugrizi usne ili obraza.

Ranice u ustima su obično bijele, ponekad sa crvenim rubovima. Ranica se u ustima može stvoriti kada osoba drži tabletu acetilsalicilne kiseline (aspirina) između obraza i desni u pogrešnom nastojanju da se oslobodi zubobolje. Ranice u ustima mogu biti simptom Behgetova sindroma koji također može uzrokovati ranice na očima i spolnim organima.

Bijela, bezbojna ranica (čankir) koja se razvija u ustima ili na usnama 1-13 sedmica nakon što je osoba imala oralni seks može biti prvi stadij sifilisa. Ta ranica često prolazi nakon nekoliko sedmica. Nakon 1-4 mjeseca, može se također pojaviti na usni ili češće u unutrašnjosti usta naknadni (kasni) znak neliječenog sifilisa, bijela mrlja (mrlja na sluznici). I čankir i mrlja na sluznici su toliko zarazni da čak i ljubljenje u tim stadijima može proširiti bolest.

Dno ustaje uobičajeno područje za rak, posebno u ljudi srednje dobi i starijih ljudi koji piju alkohol i puše. U dnu usta mogu se razviti i različite vrste cista. Često se te ciste odstranjuju hirurški, jer osobi smetaju.

Veliki mjehurići puni tekućine mogu se pojaviti svugdje u ustima. Obično su rezultat ozljede, ali

mogu biti povezani sa bolestima kao što je pemfigus. Neke virusne bolesti kao što su ospice mogu također uzrokovati prolazne promjene na sluznici obraza, pogotovo u djece.

Infekcije koje se šire iz pokvarenih donjih zuba u dno usne šupljine mogu biti ozbiljne. Vrlo ozbiljna infekcija nazvana Ludwigova angina može uzročiti teško oticanje dna usne šupljine, štoviše pritiskajući jezik prema gore može zatvoriti disajni put. Kada se to dogodi, nužne su hitne mjere da bi osoba mogla disati.

Kada osoba učestalo grize unutrašnjost obraza ili na bilo koji način ponavljano ozljeđuje unutrašnjost usta, nadražaj može uzrokovati rast fibroma. Tu malu, čvrstu, bezbolnu kvržicu može se odstraniti hirurški.

Bradavice mogu inficirati usta, ako osoba siše bradavicu koja raste na prstu. Drugačiji tip bradavice (šiljasti kondilom) može se prenijeti i oralnim seksom. Doktor može liječiti bradavicu koristeći različite metode.